

松

陵

文

獻

松陵文獻 獻集卷十三

邑人潘樉章力田撰

官師志一

潘子曰吳江置縣起於五代自是以前吏治民俗邈不可考矣然故老所傳如吳盛斌之作土田五代司馬福之捍牧圉雖其人皆韎韐者流然生而有功於民死而廟食其地尚論者有餘思焉宋世縣治草創地利未闢生齒亦稀賴當宁者畱意是邦往往妙選京朝之吏以煦嫵而生息之循卓之蹟於斯爲盛元

政不綱一羊二牧率皆苟且之治然亦有一二善者
不可沒也明興縣在畿赤之間號爲衝煩故常擇高
第有才力者任之或以治行茂異遞遷茲邑三百年
間無曠土無游士無流民非官師得人惡睹斯效哉
下至簿尉之冗司驛之微亦時有卓然能自樹立者
官無崇卑顧於民何如耳嗚呼一邑之治亂可以觀
天下之盛衰焉可不慎哉

吳

盛斌

盛斌赤烏中爲司馬奉詔與上大夫倪讓將軍徐傑
分畫地界建渭作田邑築塞自青草灘至野和溪而
斌之功居多及卒邑人葬之至今呼其地曰盛墩且
立廟祀焉

五代

司馬福

司馬福郡人始隸吳越王水軍爲游奕都虞候梁開
平三年淮人圍蘇置柵環城內外阻絕王遣兵來援
莫知城中音問以福能潛行水中遣入城淮人設網

縣銅鈴織鱗過者必覺福以巨竹觸網淮人聞鈴聲
亟舉網網舉遂得渡或浮水上則戴萍荇而行旣入
復出凡在水中者三日及援兵與城中弓矢相應淮
人以爲神時吳江始置縣以福爲都指揮使築南北
二城遂命守之卒於官福美須髯屢爲謀者入城因
剪其須淮人竟不能識

宋

趙球

趙球開封人畜書萬卷祥符中秘藏火四庫書皆盡

球上其家書授三班借職天聖中用薦知吳江縣武弁爲邑自球始嘗修築松江亭仕至右侍禁

馬尋

馬尋字子正鄆州人祥符初進士主吳江簿兄彛戒之曰到任半載可誦律書爲治民之本後彛至詰之尋曰治在孔道疲於送迎未暇及也彛不懌尋曰少徐之至冬果精律學繼登朝籍久參法寺有平允之譽累著治聲彛之力也

李問

李問慶曆三年以大理丞知吳江七年與尉王庭堅
議建廟學勸民出緡錢數百萬會詔郡縣不得新立
學遂謀移其財以建長橋初縣城爲江流所判民半
居江南半居江北非舟莫濟且有風濤之險乃相形
勢建橋橫截江中長二百餘丈用木萬計浮議四起
不爲動卒底成功後世賴之其他塘路橋梁無不修
舉美政甚多今列名宦祠

王庭堅

王庭堅字世美爲政平允與李問創建長橋晉陵錢

公輔爲記稱其精敏沉毅云

郡志載王尉而不及李令於義無取今採莫志原文以長橋之役歸功於令重首事也

張先

張先字子野康定初進士知吳江有惠政詩格清麗尤長於樂府仕至都官郎中晚歲優游鄉里嘗泛扁舟垂釣至今號其處張釣魚灣年八十九卒有文集

樂府

裴煜

裴煜字如晦嘉祐六年知吳江歐陽修梅堯臣王安
石皆作詩送之

孫覺

本正史叅郡志

孫覺字莘老高郵人舉進士熙寧中知湖州以吳江
水患命治之江橋延袤二百餘丈覺募民修築勢愈
雄壯又湖塘兩岸嘗責民以竹篠捍禦率數年一修
易敗或致潰決覺復市石增築遂得支久岸旁皆爲
良田覺材幹通敏事集而人不知勞嘗葺如歸垂虹
兩亭詮次邑中畱題百餘篇爲松江詩集歷右司諫

知蘇州終於御史中丞

按宋史本傳無吳江事惟云熙寧中出知湖州松江隄沒水爲民患覺易以石高丈餘長百里隄下化爲良田則覺之修江橋築湖塘皆此時事蓋吳江嘗屬湖州故也郡志因修隄事遂謂治平三年以民曹掾權知吳江官爵年月錯亂甚矣但覺功德在人例得附書名宦故存之

郡志云陳瓘字瑩中沙縣人元豐中進士政和元年再被謫主吳江簿未幾卒贈諫議大夫謚忠肅

王志堅云宋史本傳甚詳然不言謫吳江簿固已疑之余攷瑩中年譜政和元年方安置通州旋以上尊堯集徙台州宰相徧令所過州出兵甲護送將脅以死安得有主吳江簿之事耶况瑩中卒於宣和六年距政和改元且十有四載而云元年謫吳江未幾卒何居然則郡志所繇傳譌必因瑩中詩有三年爲吏此江濱之句耳今考此詩出見聞搜玉又有載王禹偁作者題曰再過松江蓋禹偁嘗令長洲松江實在其境則此詩爲禹偁作無疑

也今改松江爲松陵又以再過爲再謫影響附會
失之愈遠又非孫中丞之有蹟於吾邑者比也故
削不載

林肇

林肇字公權

莫云吳興人

寶元中進士熙寧三年以尚書

屯田員外郎自請知吳江始至覽江湖之勝緬懷古
人慨然有歸與之興乃卽松江勝處作鱸鄉亭繪三
高像其中旣落成遂具舟由亭下拂衣而歸

程端

程端元祐二年知吳江改建廟學有惠政

向子韶

向子韶字和卿開封人元符三年進士爲保州司法

叅軍僉書荆南節度判官秩滿知吳江郡人私鑄黃

錢流布一路知州聽民自便

徐志改爲知府按此時郡尚爲州不當作府也

子韶以爲不可騰書極言其害下令禁之一縣無敢

犯者已而中司論其事韶治故縱之吏諸縣皆曰太

守命也吳江令當力爭書具在子韶聞制使來謂當

被逮卽具舟束裝以俟吏及門卽行初知州意子韶

必引前言自解子韶至卒無一語獄成自知州以下
皆貶秩子韶獨進一官其後知州孫傑召屬縣議欲
一大保置一鼓樓保丁五人以備巡警盜發則鳴鼓
以聞子韶曰一大保二十五家而已如吳江外鎮有
合境不過五里者無慮數百家若二十五家置一樓
則不可勝計矣又以數十人持挺更巡其間有强悍
不逞者遞相侵陵則鬪爭自茲始不可爲也知州必
欲行之子韶固爭逾月不能決同列謂子韶曰不若
稟令而歸至縣則措置在我子韶曰稟令而不行則

有司得以慢令罪我矣久之卒如其言大觀三年除
開封府右叅軍靖康中知淮寧府與金人巷戰舉家
被害贈通議大夫謚忠毅今列名宦

曾懋

曾懋字叔夏贑州人崇寧間主吳江簿仕至禮部尚
書孫樞淳熙六年復繼先職見黃澣曾程堂詩序

程俱

程俱字致道信安人

王忠堅人物志云衢州開化人

元符中以外祖

鄧潤甫廕補吳江簿政平訟理有循良之風優於文

學作松江二賦三高祠詩序遠近傳誦之累官中書
舍人政和間自監舒州茶場上書論時政不合來家
於吳城北葺小屋號蝸廬其後主簿高文虎以曾懋
及俱皆爲此官作曾程堂以寓景仰范成大爲之記
文虎字炳如登紹興進士調吳江簿博通典故寧宗
朝爲中書舍人兼直學士院國子祭酒以力攻道學
爲世所譏

徐勣

徐勣字元功宣城南陵人舉進士調吳江尉初與何

執中偕事徽宗於潛邸挺挺持正爲上所重蔡京以
宮僚之舊每曲意事二人勩不少降節京嘗謂曰元
功遭遇在伯通右伯通旣相矣勩笑曰人各有志吾
豈爲利祿易哉京慙勩亦終不用以疾除顯謨閣學
士卒

李光

李光字泰發越州上虞人崇寧五年進士初知常熟
縣朱勔父冲倚勢暴橫光械治其家僮勔怒誠轉運
使移知吳江光不爲屈勔終不能害也歷知湖州徙

平江召拜禮部尚書卒孝宗賜謚莊簡廣西通志云
高宗時叅知政事秦檜以親黨鄭億年爲資政殿學
士光於榻前面折之又與檜詰難上前因數其弄權
誤國檜大怒明日光丐去中丞万俟卨論光陰懷怨
望責授建寧軍節度副使藤州安置越四年移瓊州
又移昌化論文考史怡然自適年踰八十以郊恩復
左朝奉大夫至江州卒

石公轍

石公轍字道叟新昌人紹聖二年以特奏狀元爲南

劍州教授紹興中遷知吳江初學宮在縣治西南厄
於兵燹公輒至卽以東門外開江營舊址改建焉且
置田以養士卽今學宮也邑人頌其德後通判平江
府終大宗正今祀名宦

徐似道

徐似道字子淵天台人早負才名紹興中爲吳江尉
受知范成大及爲秘書少監朝聞彈疏以舟載菖蒲
數本書兩篋翩然引去道間爭望若神仙然

李衡

本正史叅郡縣志

李衡字彥平其先江都人徙崑山博學有局幹爲文
操筆立就紹興十五年舉進士授吳江主簿部使者
怙勢侵民衡不忍以敲朴迎合卽投劾去二十三年
起爲仙居丞隆興初知溧陽縣爲治強敏專以誠意
化民稅賦以期日榜縣門鄉無吏跡而取辦先他邑
在官四年民未嘗犯重罪安撫汪澈等列上治狀召
對殿中陳便民十事詔進一秩知溫州未行拜監察
御史遇事敢言出知婺州以循良稱召爲司封郎中
遷樞密院檢詳屢請老除秘閣修撰致仕孝宗思其

朴忠復起拜侍御史會有詔外戚張說以節度使僉
書樞密直學士周必大給事中莫濟不草制敕衡與
右正言王希呂上疏力諫謂不當以母后肺腑掌兵
柄廷爭移時遷衡起居郎不拜除知台州復力辭遂
致仕四人同時去國布衣莊冶作四賢詩以紀之衡
歸崑山圓明野墅日與門人講論經義娓娓忘倦聚
書踰萬卷名其室曰樂菴學者稱爲樂菴先生淳熙
五年卒年七十九所著有易論語說易義海及文集

柳楹

柳楹字安叟東海人乾道元年知吳江作松陵漁具圖待制曾幾序之刻石尚存

趙廣

趙廣

郡志作公廣

字德儉宋宗室也淳熙四年知吳江重

建廟學取羨租以餼生徒凡郵亭使館橋梁祠宇皆一新之以薦遷徐州同知

莫若冲

本廬志

莫若冲字子謙其先仁和人避地家崇德舉淳熙二年進士爲湖州安吉尉常州教授知安吉政號平允

改知吳江撫字尤有聲歷司農丞知岳全二州以最
聞除大理丞

袁韶

袁韶字彥淳鄞人嘉泰中爲吳江丞時蘇師旦挾韓
侂冑威福撓役法提舉常平黃犖檄韶覆田定役師
旦密諭意吳江多姻黨幸相容當薦爲京朝官韶不
聽是歲更定戶籍承役者皆師旦姻黨師旦怒諷言
者將論韶犖急白於朝且薦之未幾師旦敗改知桐
廬嘉定末爲臨安尹十年道不拾遺紹定初拜叅知

政事浙西制置使仍治臨安卒贈太師越國公後許
景迂來丞吳江慕之作堂廳事之西題曰景袁云

張達明

張達明嘉泰中知吳江政平訟理有循良風作無訟
堂公暇從容與客論詩曰詩莫難於絕句絕句莫難
於五言欲其章短而意長辭約而理盡實難其才故
其畱題邑中者若松陵漁具諸作皆人所莫及後仕
至右丞

呂祖憲

呂祖憲婺州人祖謙之弟嘉定五年知吳江重修學宮有記刻石

孫子秀

本張杲人物志莫徐二表俱不載

孫子秀吳江主簿日詣學宮與諸生討論義理有妖人稱水仙太保郡守王遂將使治之莫敢行子秀往焚其廬碎其像沉其人於太湖曰副汝水仙之名矣妖遂絕

李椿

李椿維揚人紹定四年知吳江重建縣治四明袁肅

書琴堂二大字刻石椿自爲記石塘橋梁祠廟使館
皆所修築後爲吏部侍郎

元

王柔

實志作柔承

王柔字不剛大都人試安西王相府令史至元二十
九年知吳江縣公勤廉謹屏除走隸專任信牌邨民
晏然修官署學舍及三高祠設施咸有次第條理井
然

哈刺哈孫

哈刺哈孫大德九年同知吳江州事嘗語人曰牧民之官不忠勤何以盡職不公正何以聽訟不慈仁何以得民歲荒且疫爲之流涕白州長畱粟捄之曰寧拂上意以受責毋令民失所也秩滿州人立碑頌德

唐棣

莫徐二志俱不載

唐棣歸安人少從趙子昂學詩畫俱得其傳仕元爲休寧縣尹遷吳江州知州有休寧稿味外稿見湖州府志

皇甫璧

皇甫璧字君寶東平人至大三年知吳江州不事智
數政無矯飾待物一於誠始勉以文教申之以禁令
人莫敢犯在州三載以廉能稱

高仁

高仁字壽之濟南人延祐三年知吳江州以大義開
諭百姓譁健束手而怙終必刑歲役率先鉅室力稱
事辦行省賑杭饑增州糴三萬石仁抗言州小數已
溢不可增鹽運司課虧行省令仁詣浙西取盈於民
仁言民貧不可妄動動且有外虞皆不能奪事竝寢

松陵文獻卷十三
延祐二年經理田糧仁奉檄往丹陽金壇兩縣公田
舊額虛者七千仁曰朝廷豈利無田之租哉閱實悉
除之

張顯祖

張顯祖泰定元年爲吳江州判官重建長橋以石易
木爲竇六十有二每竇用鐵鉤八長丈有三尺重四
觔仍布杪枋於水底以防傾圯功畢宴犒甚厚今列
名宦祠

段廷珍

段廷珍

莫志作顧珍非

至順三年爲吳江州判官決事如流

恤民如子見徐志

余謂兩州判固賢矣亦當時爲之長者委任有功且不掩其美故能傳也嘗見元僧至仁有送徐景善赴吳江州吏目詩首句云北麗橋邊鴻雁鳴三高祠前秋水清今嘉興有北麗橋意景善卽嘉興人而吏於吳江者味此二語期待不淺而邑志併其姓字佚之以此知下僚散員湮滅無聞者多矣爲之三嘆

干文傳

干文傳字壽道其先自汴徙崑山十歲能屬文用薦
爲吳金壇兩縣教諭饒州慈湖書院山長延祐中登
乙科進士同知昌國州州居海隅民頑獷往往羣行
剽掠海中文傳柔以恩信俗爲之革遷長洲尹牒訴
輻輳歲輸糧四十餘萬石文傳聽決趣辦具有條理
徙榻公署未嘗輒出而親舊莫敢通謁會行助役法
召縣民善諭之無敢爲詭寄者再徙烏程尋擢知婺
源州朱文公遺業併於豪民子孫訴有司莫能直文

傳呼豪民折之以理悉歸之後至元六年改知吳江
州以均徭賦爲先催科追逮信立程限民亦不違邨
落之間不識吏胥治行爲諸州最至正三年召爲集
賢待制與修宋史供職勤恪史成賜賚優渥遂請老
以禮部尚書致仕優游里閭又十年卒文傳爲文雅
正不事浮藻有仁里漫稿

那海

那海高昌氏以中書舍人提點資乘庫至正五年爲
達魯花赤有惠政廣修水利今至正石塘其所築也

松陵文獻 獻集卷十四

邑人潘樞章力田換

官師志二

明

孔克中

孔克中字庸夫先聖五十五代孫吳元年知吳江州
洪武二年改縣克中仍爲知縣時承兵革之後庶事
草略民俗媮鄙克中葺遺舉遠起廢作新常如不及
故能諭民於理重建縣治及垂虹亭三高三忠兩祠

凡應祀廟墳罔不修飭

張居敬

張居敬洪武四年典史移建社稷壇於西門外山川壇於南門外莫旦云以此觀之則爲政可知

廖欽

廖欽字敬先吉陽人

胡文穆志作新淦人

宋御史中丞剛之後

少強學明易詩與弟敬存俱有才名人稱廖氏雙明月珠洪武三年以薦至京試才學優等授河內丞邑小事煩又新附疲於供億欽至捐祿入以助民時年

尚少也知府王興宗宿望老成然嚴難事獨歎獎以爲不可及清化鎮商稅多侵匿布政司捕及累年筦稅者事連數千家民洶洶竄太行山不能定遂以屬欽欽爲區畫貧富相補不數日課足除民罪布政司大善之更置酒謝而去欽一以忠信導民八年考滿時方以蘇州爲難治而吳江尤號劇縣乃命興宗知蘇州府而欽丞吳江興宗遇劇務輒以委之不得專治吳江也吳江有隄護田數千頃久爲水所壞田不得耕勢家互相爭訟至聞於朝令官爲修築責成甚

迫岸廢已數年高深數十尺彌望水決無跡可求同
僚皆失色以他事避去與宗謂使他人督之事必不
集又煩朝廷乃大言曰宜莫如廖丞也欽欣然往會
計工費召富民沈氏諭曰隄成民享其利不成我受
其禍於是私相戒當戮力告成毋累我公至期而隄
成欽精敏絕倫吏抱文案叢雜手署戶決頃刻而畢
令簿拱手嘆服未嘗疾言遽色也使民皆不忍欺將
去老稚遮道畱之頃之坐河內虧課錢三千餘爲守
者所誣遂罰作鳳陽二縣之民聞之皆來助役其居

者夜則焚香爲祈福或問欽何以能得人心如此曰
吾不知也吾視百姓猶子耳久之釋歸杜門教諸子
鄉里無賴者搆蜚語誣欽兄弟俱下獄欽曰脫俱死
如老親何我請坐之其弟不肯相讓於庭守者感動
爲流涕於是弟得免而欽謫戍富峪數年以老病還
嘗過河內民識之曰吾父也羅拜於前携酒殽相慰
勞明日哀縑數百匹以爲贈欽固却之民請不已乃
一夕遽去永樂元年以解縉薦詔同修太祖實錄旣
至而書成上曰是老儒卽以爲翰林簡討同修文獻

大成二年卒年六十三子自勤爲蜀府紀善有名

解縉曰君壯遊南北聞見充拓詩歌清麗而時發其雄奇屢考試貢舉川廣之士莫不謂君爲藻鑒權衡也君孝友篤至天子初見問所經過卽以民疾苦告天子嘗稱道之卒也遣醫勞問嘆息之而吾黨之士皆痛惜之同官會君日章王君汝玉梁君用行皆稱爲豈弟君子哭之尤哀他日史官不傳之孝友必傳之於循吏也

潘子曰余觀廖公之爲治雖古之循良何以加哉而

邑志至闕其名何濶略也嘗考王行半軒集有送吳江廖丞序盛稱其賢輒爲之耿耿於心不能忘然猶未究其實及得解學士所撰墓表及胡文穆志事跡完備余得而詮次之然後無遺憾抑丞職固非卑也自中世以降類多闕茸不稱卽有賢者亦爲資格所困不得自見豈非其地勢使然哉

劉榦

劉榦陝西人洪武三十年主簿廉謹有爲以事調衛輝府照磨

陳耘

陳耘福山人洪武三十一年主簿莅政廉平民信愛
之後遷監察御史終紹興府知府

蔣奎

蔣奎南昌人舉聰明正直洪武三十年主吳江簿盧

二志皆同莫志云以主簿陞吳江尹徐志則直云主吳江簿皆非也建文二年遷吳江

知縣政號平允卒於官

陳敏

陳敏仁和人建文末主吳江簿明果而恕永樂六年

九月擢爲刑科給事中十四年七月劾奏應城伯孫巖擅殺千戶馬俊之罪命徙交趾自是貴戚斂手

按實錄敏以永樂六年被擢則任吳江當在建文時郡志以爲洪武末蓋因革除故諱之耳志書用此例者甚多今改正

邢寬

邢寬北直隸人永樂十年知吳江撫字有方民銜其惠後擢成都知府

李昇

李昇榆次人永樂中爲丞有美政十三年六月上言
蘇松水患莫大於太湖欲洩太湖之水莫急於疏下
流近時所疏河道歲久不免淤塞今觀常熟之白茅
諸港崑山之千墩諸河長洲十八都港以及吳縣無
錫之近湖河道皆太湖之下流若循其故跡濬而浚
之仍修蔡涇等閘候潮水來往以時啓閉庶免泛濫
之患而民獲耕種之利從之

按實錄昇上疏在十三年六月而莫徐二志皆云
永樂三年任則在事已十餘年矣豈國初久任法

行故安於其職如此耶然觀水利一疏則昇之美政可槩見矣

賈忠

賈忠字能誨冀州人永樂初以諸生守城功授寶鈔司提舉宣德中累遷知吳江縣忠有兼人之才處已廉明臨政勤恕八年秩滿赴京邑民千餘上章請畱命加從六品祿復任後忤當道同僚因誣執之忠不辨而退

按宣宗實錄宣德八年九月丙午復賈忠蘇州府

吳江縣知縣陞從六品祿忠任滿赴京其民千餘人奏乞畱之故加其祿俾復任今徐表列忠於永樂初誤也

葉錫

葉錫字玄圭永嘉人宣德中舉進士選庶吉士正統元年知吳江以廉謹聞未幾以母喪去四年復除吳縣專尚德化寒暑布袍十年詔大臣察舉天下監司郡邑長吏治行卓越者得十人其中知縣二人錫居一焉命賜宴於廷加章服楮幣紀功吏部時徐侍講

理曰立圭爲治一本經術先律已而後齊人惟理之從法之守他無恤也官長承迎之私不行僚吏比周之情不接豪猾尅攘之姦不得行故雖淡得細民之心而忌者亦衆或軋之於上怵之於下咻之於傍立圭堅不動至是而循良之效白焉人以爲知言十三年擢知寧國府

王懋本

王懋本金谿人由吏爲吳江丞以剩負召還民奏保其廉能乞畱之尋以憂去正統十年十二月民間其

服闋相率伏闕請擢爲知縣吏部言其以吏出身非例也上曰懋本既有去思吏何足計其從之第不爲例事見英宗實錄徐表列在景泰元年亦誤

劉彪

本英宗實錄叅郡志

劉彪湖廣人正統末以吏授吳江丞景泰六年滿三考巡撫副都御史鄒來學薦其處事公勤吏民懷慕乞晉秩畱任命遷知縣居官不携家累以廉幹稱

梁和

梁和字貴和其先泰和人徙應城舉賢良方正天順

四年爲吳江丞有廉惠

韓槃

本憲宗實錄

韓槃字簡英安陽人以御史調知吳江成化二年七月吏部奏府州縣官四十八人廉能公正撫字勤勞乞賜誥勅旌異槃與焉擢邳州知州時稱其端潔

陳堯弼

本莫氏續志

陳堯弼字秉均太和人貢士成化十七年知吳江明年錦衣衛千戶王臣同內侍下兩浙市珍寶威燄薰炙至吳江挽船失役至數百人索千金闔邑動搖佐

貳皆走匿堯弼力與抗奮不顧身邑人亦皆鼓譟而出奪其器械遂斂避去時巡撫王恕在南京聞之卽具奏磔於市天下稱快繼有奉命取製衣梅者一梅費中金一兩民間梅樹悉懸紅牌邑人惶惑堯弼令伐樹以滅跡使者怒堯弼叱之曰君往浙江幹辦吳江非浙地也果有朝命當以公移下之豈有私懸牌以擾民萬一激變罪將安歸使者語塞而退尋以憂去後歷官辰州知府太僕寺丞

孫顯

本莫氏續志

孫顯字微之華州人成化二十一年由舉人知吳江廉介有爲嘗修縣志改知靖江

王鑑

王鑑字克明吳橋人弘治三年以監生主吳江簿守已廉潔常祿之外一介不取其弟自故鄉來鑑不悅卽遣歸太學生申顯知其無行貲也餽粟一斛已而弟卒鑑召申氏還之有馬役來謁循舊例獻白金一兩鑑怒擲庭下草中其人言公不受當見還奈何棄之鑑笑曰此吾過也命拾還之每公宴同僚皆衣錦

繡鑑獨衣麓布青袍殊無愧色人或規之曰君何自
苦乃爾鑑歎曰吾見世之黷貨者多矣歸則隨手蕩
盡惟畱醜聲於世耳且朝廷使我來此作官不使我
作盜也言者愧服巡撫佶鍾奏旌異之在位九年滿
去邑人爲作清官歌

金洪

金洪字惟淡鄞人舉進士知靖江縣弘治四年調吳
江始至吏胥抱案牘請署以嘗洪洪陽不省唯唯書
之吏以爲易與居三日請署如故洪怒曰若謂我不

事事耶摘三日所署出入隱竄者杖之吏股栗性明
敏獄訟填委移時而決撙節用度歲裁去橫歛銀二
十萬兩預積米至二十七萬餘石戶口增至一十二
里是時豪猾縱橫賦役繁劇小民每占一役必破產
捐軀洪歎曰虐政有甚此者乎乃抑勢家除奸吏廣
分諸役以調劑之民感其德至有生子以金爲姓者
上官爲請於朝頒其法行之一郡每六察按視獨吳
江無訟怪問知府曰金令故善撫民也七年吳中大
水邑人葉紳建言疏通水利命工部郎中徐貫等行

求水道開白茅港諸處吳江役夫一萬八千有奇適
嚴冬雨雪人憚遠涉皆惶駭洪請畱以通長橋水竇
疏太湖之水以入吳淞江至明年二月方受事人日
給米二升病者予藥遇風雨則少休親乘小舸往來
課督役成而民不告病他邑役夫十餘萬分濬白茅
以下饑寒死者甚衆九年遷試御史踰年爲真巡按
山東甚有聲正德元年擢知松江府坐減官布價米
劉瑾矯旨械洪至京不能害放歸

徐師曾曰稅長倚辦最爲繁劇然諸役竝受節制白

是奸宄得以威行於鄉閭洪寬其倚辦而裁其節制
民兩便焉又以餘力從邑士大夫飲酒賦詩以爲常
然性苛刻忤之者必墟其地而後已此則爲少短

郭郭

郭郭字于藩肥鄉人進士弘治八年知吳江

徐表在九年

廉潔無私公明有威興利革弊吏人膽落非宣召不
敢近前下至隸卒無所取索士民愛之十一年以憂
去後遷御史

劉澤

劉澤字濟民濟寧州人進士弘治十三年知吳江才識明敏斷決無倦一日偶出見瞽男女三人行乞疑之乃令捕其丐主李廣至而召瞽男顧來旺近案密問之來旺不覺號泣自言嘉定人爲廣誘入舟用針刺其目令之乞食同行兩女子亦然又召問兩女子具得其實卽治廣罪遣三人歸一時皆異其事十八年召爲給事中

張玄

張玄陝西人弘治中爲典史以廉稱卒於官周恭肅

公用以詩哭之曰儀牀忍見舊檀青伐石誰書地下
銘佳士祇應聊入幕好官何必盡明經荒祠稍稍題
新字旅櫬行行見暮星此夜吳淞江上月獨畱清影
照西廳公自註玄廉吏

徐欽

徐欽陝西人嘉靖初爲主簿仁恕廉明凡刑罪人每
至泣下邑中水旱齋戒祈禱多獲奇應民以菩薩呼
之卒於官卽城隍廟西廡立像奉焉

張明道

本王志堅人物志

張明道字希程羅田人嘉靖八年進士授都察院都事謫滁州判官十三年擢知吳江政務大體不拘文法前令取常例於糧長丞以下效之糧長又轉科於民明道至手爲文以矢於神丞等皆失色未幾或以墨敗明道嘆曰神其不我欺耶縣當孔道使節旁午餽送皆資於民明道一切裁省雖失歡貴客不顧曰剝民求名吾甚耻之公宴治具皆取之坊長明道力行節儉減常費十之七民以訟至今自拘審非大故不公差鄉民至終歲不識隸卒或事連骨肉召至曲

爲剖論必令感悔乃已未嘗輕抵於法嘗曰利與害
相須吾幸居官食祿而復苟取若天道何雖所得奉
錢多以充公用有一姬鬻孫以償官逋一孤兒以官
逋被繫明道皆爲代輸廨舍蕭然薪水時不給未嘗
動念居期年遷刑部主事瀕行所攜止二敝籠後終
按察副使徐師曾稱其持已修潔撫民慈祥國朝廉
吏未有過於明道者也

喻時

本王世貞撰傳

喻時字中甫光州人嘉靖十八年以進士知吳江邑

中賦重吏素乾沒爲奸利時至則嚴勾校具得其狀
始爲絜法提衡之秋夏稅以限上不事敲朴力役則
應毋待號召鄉小民鬪鬪毋復之三老就公庭片語
立決遣之各自得意去上臺下訊牒及他利害關白
鐫一大櫃中手自封發吏不敢望得其一嘖笑而鄉
小民亦不復知有吏時不爲操切間有所劾治皆取
大猾尤者吏及大猾惴惴戴三尺而立然竟其任亡
敗墨吏卽御史行部吳江亦不問吏及大猾主名曰
令代我治之矣遠近稱曰喻青天竟用治行第一徵

拜御史前是太保王肅敏公廷相見其文而善之意不欲其外補時對曰我不外也誰當外者廷相奇其言而疑其不讐後乃心服後終南京戶部侍郎有集

王國光

王國光字汝觀陽城人進士嘉靖二十五年知吳江僅再期以憂去其爲政善因事以爲功適俗以成治有合於古之循吏嘗書禹之治水行所無事二語於座隅及其去也民謳思之起爲吏部主事歷官戶部邑中稅戶以輸輓至者皆垂寬恤萬曆初官至吏部

尚書

萬思謙

本南昌嘉定二志

萬思謙字益甫南昌人嘉靖二十六年進士授行人二十九年謫吳江丞署嘉定事遂爲真政尚惇大不矜名炫才人莫窺其際嘉定多逋賦逃亡者衆田益荒嘆曰治此如烹鮮可更爲擾乎且民有死耳賦終不可得償不如因而寬之且以招集亡者時稱其識大體三十二年夏倭薄東城乘風焚倉舍城幾陷叩頭籲天風反火滅賊酋連中矢石斃乃解而去以土

城難守議易以甓會遷刑部主事畱以訖工明年城
成賊果大至恃以無恐思謙遇事熟思若不能決不
知者以爲不快思謙聞而笑曰昔人云後人當思此
憤憤殆謂我哉旣去人果思之不置後思謙以久次
轉光祿寺丞坐長揖冢宰外補累至福建左布政使
家徒壁立遷南京太常寺卿致書張居正勸復言官
切直忤指遂致事歸篋無遺帛清節天成士論歸之

楊芷

楊芷字文植德安人嘉靖三十二年知吳江倭分鈔

內地縣城庠薄四面阻水人無固志芷捐奉鳩工士民感其義爭出貲築之作堤於夾浦立堡於唐湖凡險積要害竝以木柵鎖截造戰船大者爲中堅次爲左右翼小者爲游奕勾連相錯日頓兵江上廣斥候令民安意田作且耕且守流亡漸歸故用兵四年獨吳江資儲不匱初倭從崑山直抵青陽港芷以飛艦斷其上流復命兵快詐爲商船誘戰斬首十八級又戰於陳湖生禽二酋自是吳人始有鬪志後三月倭趨石湖芷獨乘小舟率兵出瓜涇港邀之湖水淺涸

倭列伍逆上芷以鈎攢搏之餘舟謀進斬首十六級
馳入城明日賊逼城下不敢攻燒倉廩掠民財遂南
下芷率兵躡之斬六級三十四年正月倭陷崇德大
掠從南潯轉至梅堰兵備叅政任環率沙兵禦之敗
績芷率奇兵張兩翼於六里橋之東西蕩中夾攻斬
首十五級飛礮擊死者二十餘人倭尋夜遯四月復
從嘉興至唐湖湖水洶涌芷引兵阻戰倭駭奔平望
奪舟橫渡芷令善泅者鑿其舟而自屯兵盛墩斷其
堤且布釘板於水底賊不敢渡又無所得食會宣慰

使彭蓋臣率兵二千來援我兵勢合與倭戰於平望
蓋臣爲先鋒斬首百餘級轉鬪至楊家橋斬三十餘
級蓋臣被創死我兵乘之生禽一賊斬首十八級於
是將士知賊易破人人思奮皆以盛墩一捷爲之先
聲故更其名曰勝墩云六月倭自杭州經爛溪抵平
望芷督水兵與戰斬首三十六級生禽四人遂遁去
芷雖久在兵間其所理民事皆中肯綮撫按交上其
功累被獎賚然以不能俯仰遷南京戶部主事以去
累遷南京兵部郎中

李遷梧

李遷梧字茂陽安丘人進士嘉靖三十八年知吳江
四十年大水遷梧日夜拊循其人而部使者方以權
算爲賢遷梧持不爲動曰民畢力以障水猶懼不給
况忍驅之鬻妻子供租稅耶於是日閉閣宴坐不復
問一事時具蔬果邀一學師共酌庭中寂無人鄉民
至不復到縣卽上官有所督課則自却冠帶攜衣帽
以往胥吏感其德亦不忍欺明年四月市人不戒於
火延及公署一夕而燬方火作時遷梧坐門下戒僚

吏徙獄囚移帑藏歛圖籍無所散失未幾卽謀興復取材於垂圯之庾取力於鄉兵之隙取貲於失火之家而里出夫三日訟出鍰數金以佐之上不費帑下不煩民越百日告成閭閻踰舊蓋遷梧在邑罹水火之厄各一而人不知有災後萬曆十五年邑復大水士民追思爲木主置城隍廟祀之知縣劉時俊至乃採公論祀之學宮距其去已四十年矣故老嘗言一御史按部至臥牀折足御史怒入縣治欲親刷庫藏至廳事後顧見東壁一小牀敝葛爲帷旁置竹筥二

無鎖鑰召左右詰之則遷梧臥具也乃淡媿嘆一無所問而去嘗與邑紳吳知府崑飲崑以一銀船注酒酒滿則帆張意頗喜之崑卽舉以爲贈遷梧受而日以供飲後任滿出境卽還之後有廉吏聞而嘆曰其後之却還不足言若初之直受非吾輩所能也

吳一本

吳一本字仲立沔陽人嘉靖四十一年以進士知吳江精於吏事夜翬翬注思不輟甫曙卽行之纖悉有法度吳江賦浩穰總賦者類嘗以私盈縮其間甲賦

千乙賦百或千者得十九而百不能十一則匿其數而獨發其逋當事一切按程無所上下一本乃具格書所輸數計戶分給而總賦之書不得數易始至適大水之後人民離析部檄徵如常額一本以恩信勸諭民皆輸將恐後先是縣官交際間遺率資里甲里甲者貯丁田之羨以供諸費者也時詘則告病一本曰奈何以吾私故困民則悉籍丁田於官吳江水兵故稱雄而擾民亦甚一本曰巡司之有弓手以扞寇也而又益之水兵是倍費也則去弓手而代以水兵

無事散於諸司有急則聚之城以爲衛其所興革雖若煩碎然爲人強力行之裕如遷工部主事後官至山東參議暴卒不竟其用

李三省

李三省鄖陽人萬曆七年以歲貢主吳江簿九年遷崑山丞以一竹兜輿至食無肉牀無帷三年如一日有范某者以佛會煽惑男女嘗百餘人自號佛頭而誘少婦與私有孀婦聞而招之白日宣淫時知縣以公出三省得其實縛而撻之至死已卒於官二邑人

莫不憐之